

Malaika Nyumbani

Kwa kuwa atakuagizia malaika zake Wakulinde katika njia zako zote. Mikononi mwao watakuchukua, Usije ukajikwa mguu wako katika jiwe—
Zaburi 91:11, 12.

Malaika wa Mungu wanatulinda. Juu ya dunia hii kuna maelfu na makumi elfu ya wajumbe wa mbinguni walioagizwa na Baba ili kumzuia Shetani asipate fursa juu ya wale wanaokataa kutembea katika njia ya uovu. Na malaika hawa wanaowalinda watoto wa Mungu duniani wanawasiliana na Baba mbinguni. “Angalieni msidharau mmojawapo wadogo hawa;” alisema Kristo; “kwa maana nawaambia ya kwamba malaika wa mbinguni siku zote huutazama uso wa Baba yangu aliye mbinguni” (Mathayo 18:10).

Ni nadra sana kupata mtu kati yetu anayetambua kwamba malaika wanatuzunguka, ambao huwahudumia wale ambao watakuwa warithi wa wokovu, wanatuokoa wengi wetu kutoka kwenye majaribu na matatizo mengi. Familia yote ya mbinguni inavutiwa sana na familia ya hapa duniani; na tunapaswa kushukuru sana kwa sababu ya upendo huu uliooneshwa kwetu mchana na usiku.

Maneno yanayozungumzwa nyumbani mwetu yasiyo ya uvumilivu na yasiyo mema, yanasikiwa na malaika; na je, ungependa kukuta katika vitabu vya mbinguni kumbukumbu ya maneno yasiyo ya uvumilivu na ya huruma uliyoyasema katika familia yako? Kukosa uvumilivu humleta adui wa Mungu na mwanadamu kwenye familia yako na kuwafanya malaika wa Mungu kuondoka. Ikiwa unakaa ndani ya Yesu na Yesu ndani yako, huwezi kuzungumza maneno ya kuchukiza.

Kina baba na kina mama, ninawasihi kwa ajili ya Kristo, muwe wema, wapole na wavumilivu nyumbani kwenu. Kisha nuru na jua vitaingia nyumbani kwenu na mtahisi kwamba miale angavu kutoka kwenye Jua la Haki inaangaza mioyoni mwenu.

Ni kutokuwepo kwa neema ya Roho wa Mungu ambako kunaiacha nyumba kuwa gizani na kuwa na hali isiyo ya furaha. Nyumba yako inapaswa kuwa patakatifu palipobarikiwa ambapo Mungu anaweza kuingia na malaika Zake watakatifu wanaweza kukuhudumia. Ikiwa ukosefu wa subira na ukosefu wa fadhili vinadhihirishwa kwa mtu na mtu, malaika hawatavutiwa nyumbani kwenu; lakini mahali ambapo upendo na amani vinakaa, malaika hawa wa mbinguni wanapenda kuja na kuendelea kuleta mvuto Mtakatifu zaidi wa makao ya mbinguni.